



Inatsisartunut ilaasortaq Knud Fleischer  
(Kattusseqatigiit Partiat)

**§ 37 naapertorlugu apeqqummut, nr. 2011-089-mut akissut, KNFL Akuersissutininut akiliisitsisalernissaq**

Inatsisartut suliariaasianni § 37 naapertorlugu Inatsisartunut ilaasortaq Knud Fleischer (Kattusseqatigiit Partiat) matuma kingulianiittut uuliasiorluni gassisiorlunilu ujarlernermit akiliisitsisalernissamat tunngasut Naalakkersuisunut apeqqutigai:

**Naalakkersuisunut apeqqut:**

"Nunatsinni olie-siornissamat, gas.-mik ujaarlernissamat aatsitassarsiornermut allanillu ujaqqanik erlinnartunik ujaarlernissamat nunatta avataaniit soqutiginnittorpasuit akuersissutinik qinnuteqaateqartarnerinut akiliisitsisalernissaq naalakkersuisut qanoq isumaqarfigaat?"

**Tunngavilersuutaasoq:**

*"Nalunngilarput nunarput ataatsimut isigalugu avataaniit soqutigineqartorujussuuvoq. Allaammi maannamat paasinarpoq avataaniit suliffeqarfissuit assigiinngitsut pisuussutininik assigiinngitsunik misissuinissaminut qinnuteqaataat maannamat katillugit 120 misaaniittut.*

*Kattusseqatigiit Partiiiniit isumaqarpugut pisuussutit assigiinngitsut nunatsinni pigineqartut aamma ilisimasat nunatsinniit annissuutiinnarneqartartut nammineerluta aqunne-runissaannut iliuuseqartariaqartugut.*

*Taamaattumik misissuinissanut piunasaqaatit aallaqqaataaniilli eqqumaffiginissaat pingaaruteqartut isumaqarfingaagut. Pingaartumik avatangiisinik pinngortitamillu illersuineq aamma eqqarsaatigalugit.*

*Takorloorsinnaavarput – ilumut immaqa assersuutigalugu qinnuteqaatit 120-it maannamat tunniunneqareersimasut – qinnuteqaammut ataatsimut 1 mio. kr-inik piunasaqaateqarsimagutta – taava nunatta karsianut 120 mio. kr-nit isertitsissutaassangaluarput.*

*Soorunami qinnuteqaatit ataasiakkaat qanoq akeqartinneqassanersut eqqartorneqarsinnaasut isumaqarpugut."*

**Akissuteqaat:**

Aallarniutigalugu akissuteqaatinni soq gassi, uulia aatsitassallu samminerlugit aallaqqaammut oqaatigissavara. Apeqquteqaaterni gassisiorluni uuliasiorlunilu misissuinermit akiliutissaq taavat, kisiannili aatsitassat taanagit. Tunngavilersuuterni pisinnaatitsissutit 120-it pingaartumik aatsitassarsiornermissamat akuersissutaasut taavatit. Taamaattumik naatsorsuutigaaara apeqquteqaatit uuliamut/gassimut aammalu aatsitassanut suliaasaqarfimmut tunngasuusoq.

7. april 2011  
Sagsnr. 2011-047832  
Dok. Nr. 604013

Postboks 930  
3900 Nuuk  
Tlf. (+299) 34 68 00  
Fax (+299) 32 43 02  
E-mail: bmp@nanoq.gl  
www.nanoq.gl

Uuliasiornermut suliassaqarfimmi Naalakkersuisut 2009-mi ukiup qiteqqutereernerata kingorna akileraarutinut, suliffeqarfiup akiliutaanut aamma pisortat peqataanerannut (Government Take) ilusiliaq ataasimoortoq Naalakkersuisut akueraat. Akileraarutinut suliffeqarfiullu akiliutaanut ilusiliaq Ikummatissiassanut periusissamut ataatsimoortumut akuerisaasumut ilaavoq, tassani siunertaalluni ikummatissiassanut suliassaqarfiup inuiaqatigiinnut kalaallinut sapinngisamik annertunerpaamik iluaqutaasumik ineriartortinneqarnissaata qulakkeerneqarnissaa.

Qalluinermi sinneqartoorutininik inuiaqatigiit annertunerpaamik pissarsiaqarnissaat qulakkeerneqassaaq. Ikummatissiassanik niuerutigineqarsinnaasunik nassaarsinnaanissamut misissuinerinik ingerlatat naammattumik qaffasissuseqartuaannarnissaat pisariaqarpoq. Taamaattumik ikummatissiassanut pinnaatitsissutinut atugassarititaasuni uuliasiorfiutileqatigiiffiit annaasaqaataasinnaasunik misissuinerinik ingerlataqarnissamut kajumissuseqalersinneqarnissaat aammalu aningaasatigut atugassarititaasut unammillersinnaasuseqarnissaat aamma periusissami siunertaavoq.

Kalaallit Nunaanni ikummatissiassanut suliassaqarfimmi ilisarnaataapput, nunami pisutsit pissutigalugit, soorlu sikoqartarnera, anori, silap pissusaa, qaamasarnera/taartarnera il.il., misissuinermut, annertusaanermut aamma ingerlatsinermut aningaasartuutit annertusarnerat. Aningaasartuutit taakkua qaffasissuusarnerisa malitsigisaanik suliffissuit uuliasiornermik ingerlataqartartut misissuinermut ingerlatat ataatsimoortut annertunerpaartaannik isumaginnittuusarnissaat pingaaruteqartorujussuavoq. Taamaallilluni suliffissuit Kalaallit Nunaanni uuliasiorluni misissuinermut soqutiginnilersinnissaat periusissani siunnerfiuvoq pingaaruteqartoq. Tassunga atatillugu qanoq, qaqugu aammalu atugassarititaasut qanoq ittut tunngavigalugit Kalaallit Nunaanni misissuinissamut qalluinissamullu akuersissutit neqeroortitsivigineqartarnissaannut tunngatillugu siunertaasut ersarissut pisortanit saqqummiunneqartarnissaat pingaaruteqarpoq.

Aningaasatigut killissaliussani atugassarititaasunilu ikummatissiassanut neqeroortitsinermut atatillugu aalajangersarneqartuni ilaatigut siunertarineqarpoq inuiaqatigiit nunami pisuussutinut uumaatsunit isertitanit naammaginantumik pissarsiaqarnissaasa qulakkeerneqarnissaat, ilaatigullu suliffissuit annaasaqaataasinnaasunik aningaasaliinissamut soqutiginninnissaasa qulakkeerneqarnissaa. Taamaattumik uuliasiorfiutileqatigiiffiit Kalaallit Nunaanni misissuinissamut qalluinissamullu akuersissutinik qinnuteqartinnissaannut aningaasatigut atugassarititaasut naammattumik unammillersinnaasuseqartinnissaat pingaaruteqarpoq.


Tamanna tunngavigalugu Naalakkersuisut aningaasatigut killissaliussanik atugassarititaasussanillu Kalaallit Nunaanni uuliasiorluni ingerlatanut atuuttussanik aalajangersaapput.

Nunanut allanut sanilliussilluni misissueqqissaarneq nunani arlalinni uuliamut gassimullu tunngatillugu misissuinermut qalluinerimullu aningaasatigut atugassarititaasussanut tunngasoq, nunani tamalaani akuerisaasumit nukissiuuteqarnermut siunnersuisarfimmit IHS Energy-mit suliarineqartoq tunngavigalugu, Kalaallit Nunaannut "Government Take"-mut ilusiliaq unammillersinnaasuseqartoq aalajangiunneqarpoq, makkuninnga ima-qartoq:

- Ingerlatseqatigiiffiup akileraarutaa aamma iluanaarutinit akileraarut katillugit 37 %-imik annertussuseqartoq
- Sinneqartoorutinit akileraarut 7,5 %-iusoq, akileraaruteqannginnermi imminut akilersinnaassuseq 21,75 %-imit + ernialiuussamit qaffasinnerusimappat, imminut akilersinnaassuseq 29,25 %-imit + ernialiuussamit aamma 36,75 %-imit + ernialiuussamit qaffasinnerusimappat 17,5 %-imut aamma 30 %-imut qaffassalluni
- Misissuinerup ingerlanerani NUNAOIL A/S-ip 12,5 %-imik akiliunneqarnera
- Akitsuutit akiliutissallu oqartussaasut suliarinninneranni aningaasartuutit matussissutissat

Ilusiliap atuunnerani akileraarutinit, suliffeqarfiup akileraarutaanut aamma sinneqartoorutinit pisortat pissarsiassaannut Kalaallit Nunaanni uuliasiorluni ingerlatanit sinneqartoorutinit 59 %-imik Kalaallit Nunaat akiliisitsisarpoq. Tamatuma saniatigut Kalaallit Nunaanni uuliasiorfiutileqatigiiffiit uuliamik gassimillu annertooujussuarnik akileraarutitigut suliffeqarfiullu akileraarutaatigut isertitaqaataasinnaasunik nassaarnissaq siunertaralugu misissuinerup pisussanut pilersaarummik annertuumik akisuumillu ingerlatsinissamut pissusaaffilerneqartarput.

Nunanut allanut sanilliuussilluni misissueqqissaarnermi nunat 17-it ilaatinneqarput. Inerliussat takussutissiami matuma kingulianiittumi takuneqarsinnaapput:



Naatsorsuinerup assersuusiamik Kalaallit Nunaat ilusiliami maannakkut atuuttumi akileraarutinit, akitsuutit pisortallu peqataanerannut (Government Take) 59 %-imik akiliisitsisarpoq.

Sanilliuussinermi takuneqarsinnaavoq Kalaallit Nunaat nunanit uuliasiornermik inerititsiluarsimasunit taamatullu nunanit misissuiffiqarpianningsunit saniliusunillu qaffasinnerusumik akiliisitsisarpoq. Taamaalilluni Kalaallit Nunaat Canada NWF-imit, Savalimmiut, Tuluit Nunaannit, Argentinamit New Zealandimut, Marokkomit aamma Falklandip qeqertaannit, unammillertaasunit unammillernerpaanut ilaasunit, Nunap pissarsiassaannik akiliisitsinerusarpoq.

Naalakkersuisut immikkut ilisimasallit arlallit isumasioqatigalugit naliliipput, akileraarutitut, suliffeqarfiup akiliutaannut aammalu pisortat peqataanerannut ataatsimut katillugit 59 %-imik akiliisitsiviusartunut, maannakkut annertussusiliussanik qaffaanissaq isumatusaarnerunavianngitsoq. Kalaallit Nunaanni uuliasiornermik ingerlataqarnermi pissutsit suliaqarnermi ilungersunartorsiorfiusarmata aammalu annertuumik aningaasartuuteqarfiusarluni, akileraarusiinermi ilusiliamik aningaasaliinissamik tunuarsimaartitsisussamik atuutsitsilinnginnissaq pingaaruteqarpoq, pissutigalugu taamaaliornerup sumiiffimmi misissuinissaq pinngitsoortittussaammagu. Taamaalilluni akileraarusiisarnerup maannakkut annertussusaa qaffanneqassappat, ingerlatseqatigiiffiit Kalaallit Nunaanni aningaasaliinavianngitsut ilimanaateqarpoq.

Peqatigisaanik eqqaamaneqassaaq pisinnaatitsissutinut atugassarititaasut sumiiffinnik pisinnaatitsissuteqarfiusunik utertitsinissamik piumasaqaatinik sukannersorujussuarnik imaqarmata. Piffissap ilaannut piffissaliussat naaneri tamaasa sumiiffiup pisinnaatitsissuteqarfiusup 30 %-ia utertinneqartassasoq ataatsimut isigalugu maleruagassaavoq. Tamatumani uuliamik niuerutigineqarsinnaasumik nassaartoqassagaluarpat, sumiiffiit tamatuma eqqaaniittut qaffasinnerusumik akileraaruteqartitsiviusussanngorlugit nutaamik neqeroortitsivigineqarsinnaanissaat qulakkeerneqarpoq.

IHS Energy-p aamma nunani tamalaani nunanik sanilliuksilluni misissueqqissaarnermini misissorpaa, nunat sorliit pisinnaatitsissutinik tunniussinissamut atsiornermi bonusimik piumasaqarsinnaanersut, aammalu nunat sorliit atsiornermi bonusimik piumasaqaateqannginnersut. Paasisat takussutissiami matuma kingulianiittumi takuneqarsinnaapput:

Pisinnaatitsissummik tunniussinissaq sioqqullugu atsiornermi bonusimik AKILISITSISANNGILAQ	Pisinnaatitsissummik tunniussinissaq sioqqullugu atsiornermi bonusimik akiliisitsinnaavoq
Australien	Alaska
Argentina	Barbados
Danmark	Brasilien
Falkland-ip qeqertai	Canada
Savalimmiut	Gabon
Marokko	Kazakhstan
New Zealand	Mauretani
Norge	
Tunesien	
Storbritannien	
Grønland	

Pisinnaatitsissunik tuniussinnaanissamut imaluunniit Kalaallit Nunaanni uuliasiorluni qillerinissamik akuerineqarnissamut Kalaallit Nunaat annertooujussuarnik akiliuteqartarnissamik piumasaqaateqassappat, ilanngullugit pisinnaatitsissutinut akiliutissat, uuliasortut naliliineq malillugu aningaasaliinissatik nunanut bonusinik taamaattunik akiliisitsisanngitsunut nooriaannaavaat, soorlu assersuutigalugu Australien, Argentina, Danmark, Falklandip qeqertai, Savalimmiut, Marokko, New Zealand, Norge, Tunesien, Tuluit Nunaat.

Aamma akitsuutiniq allanik Kattusseqatigiit Partiiannit siunnersuutigineqartutut anner-tussusilinnik akiliisoqartarnissaanik Naalakkersuisut maannakkorpiaq pilersaaruteqan-gillat, pissutigalugu aningaasat sapinngisamik amerlanerpaat misissuinermi ingerlata-nut atorneqarnissaat siunnerfigineqarmat, taamaalilluni Kalaallit Nunaanni uuliamik nas-saartoqarsinnaaniassamat, taamaalillunilu isertitassanik annertoorsuarnik pissarsisin-naalerluni, aningaasaqarnikkut imminut napatitsisinnaalersinnaasunik. Uuliasiorfiutileqa-tigiiffinnut ukiuni kingulliuernerusuni isumaqatiginninniarnernit misilittakkat tassaapput, taakkua annertuunik aningaasartuuteqarfiusartuni Kalaallit Nunaattut ittuni aningaasar-tuutissanut eqqummarittorujussuusut. Akitsuusiineq assersuutigalugu DKK 1 mio.-inik annertussuseqartoq, ingerlatseqatigiiffiit Kalaallit Nunaani ingerlataannik allanik annikilli-sitsisussaassasoq ilimanaateqarpoq. Tamatumani saniatigut akitsuutit annertusinerat namminersomermut isumaqatigiissutip malitsigisaanik ataatsimoortumik tapiissutip anni-killisinneqarnerannik kinguneqartussaavoq (akitsuutit ataatsimut katillugit ukiumut DKK 75 mio.-inik annertunerulerpata). Ataatsimut isigalugu taamaalilluni akiliuteqartitsisaler-nermik atuutsitsilissagaluarutta Kalaallit Nunaannut aningaasaliinerit/akiliutaasut anni-kinnerulissasut ilimanaateqarluinnarpoq.

#### Aatsitassat

Aatsitassanut Ikummatissanullu Pisortaqaarfiup siusinnerusukkat Price Waterhouse Coopers (PWC) ingerlatseqatigiiffiit aatsitassarsiorluni misissuinermik suliaqartartut Kalaallit Nunaanni suliaqartut akiliuteqartinneqartarnissaannut (akitsuut) periarfissanik misissui-tissimavaa.

Misissuinerup takutippaa misissuinernek suliaqarnerni annikinnerusuni amerlanertigut aningaasartuutaasartunik eqqumaffiginninnissaq pisariaqartartoq. Taamaattumik ani-ngaasartuutiniq qaffasinnerulersitsineq aningaasaliinissamik aalajangiinernut pingaar-uteqartussaavoq aammalu pisut ilaanni aningaaliinissamat akornusiisinnaassalluni, pissu-tigalugu peqarfik aningaasarsiuutaasinnaasut imminut akilersinnaasooq pineqartoq an-neruumik ilimanaateqarsimangippat, ingerlatseqatigiiffiit aatsitassaqaarfinni annikinne-rusunik aningaasartuuteqarfiusussani misissuiniissartik qinertussaassammassuk. Tama-tuma Kalaallit Nunaat sumiiffinnut misissuiffigineqarpiangitsunut (sumiiffiit misissuine-rup aallartilaarneranut killiffeqarfiusut) unammillerfiusunut naleqqiullugu iluaqusii-saangitsumik inississinnaavaa.

Suliaqartut annikinnerusumik ingerlataqartut arlallit takussaasarnerat aatsitassanut su-liassaqaarfimmi atuunnerusarunarpoq, kisiannili aamma ikummatissiassanut suliassaqaar-fiup iluani misissuinernek suliaqartunut arlalinnut tamanna pisarpoq, tassani soorunalimi aamma suliaqartut arlalinnik annertoorsuarnik ingerlataqartut patajaalluinnartumik ani-ngaasaateqartut takussaasarlutik.

Aallarnisaanermi aningaasartuutit aamma/imaluunniit ataasiartumik aningaasartuutaas-sussat annertunerulernerat suliaqartunit mikinerusunik ingerlataqartunit aningaasaliinis-samat akornusiisutut isigineqarsimapat, tamanna ingerlatseqatigiiffiit mikinerusut tunuar-lutik misissuinernek suliaqartut ikinnerulernerannik sunniuteqarsinnaassaaq. Tamaalilluni soqutiginninneq annikinnerulersinnaavoq aammalu suliassaqaarfimmi unammilleqatigiin-neq annikinnerulersinnaalluni. Suliaqartut angisoorsuarnik ingerlataqartut akiliutissamik siunnersuutigineqartutut annertussuseqartumik unitsinneqarnissaat ilimanangilaq, ki-

siannili taakkua peqarfinni anginerusuni misissuinissamut salliusussaaitaffeqassasut ilimanaateqarneruvoq. Taamaalilluni peqarfiusinnaasut akunnattumik annertussuseqartut imaluunniit mikinerusut arlallit ingerlatseqatigiiffinnik misissuinissamut soqutiginnittunik pilerilersitsiviusinnaajunnaarsinnaanerataarlerinaateqarpoq.


Misissuinermik ingerlatanik aallartitsinissamut aningaasartuutit pingaaruteqarnerannut assersuutissaqissoq tassaavoq Norgemi ikummatissiassanut suliassaqaarfik, tassani siusinnerusukkut misissuinermi ingerlatanut 78 %-imik akileraarutitigut taarsiissuteqartartarpoq, tamatumalu kingunerisaanik aatsitassarsiorfinni mikinerusuni ingerlatat annertusisimapput. Tamanna pitsaasumik sunniuteqarsimavoq, peqarfiit taamaattoqarsimanngitsuuppat misissuiffigineqarnaviannngitsutut paasisaqaarfigineqarnaviannngitsutullu ilimanaateqartut paasineqarsimallutik.

Ataatsimut isigalugu matuma siuliani pissutsini nassuiarneqartuni uppersarsineqarpoq suliaqartut ingerlatanut naleqqussaqqissaakkanik aningaasaateqarlutik suliaqartartut, aammalu suliaqarnerit annikitsut taamaalillutik ingerlaavartumik ukiumi tulliuttumi ingerlatassat matussusemniarlugit aningaasassarsisoqartarluni annikitsuaraannarnik aningaasaateqarluni suliarneqartartut (suliamut aalajangersimasumut aningaasaliinertut assigisaatullu). Akiliutissaq 1 mio. koruuninik annertussuseqartuq taamaattumik maannakkut aningaasartuutaasartut annertussusaannut naleqqiullugu annertooujussuusussaavoq.

Misissuinerup (PWC) aamma takutippaa aatsitassarsiorfiutileqatigiiffiit 1/3-iisa missaanii Kalaallit Nunaanni misissuinermik suliaqartut 1. mio. koruunit inorlugit atoriaannarnik aningaasaateqartut. Akiliuteqartitsisoqartalissappat ilimanarpoq ingerlatseqatigiiffiit Kalaallit Nunaanni suliaqartut 1/3-ii amerlanerunissaalluunniit ilimanarluni, maleruagassat nalinginnaasut malillugit misissuinermi pisussaaffiusussatut piumasagaataasut naammassisinnaajunnaassagaat. Taamaattumik akiliuteqartitsisalernerup Nunap Karsianut 120 mio. koruuninik isertitaqarnerulersitsinissaanut taarsiullugu, taakkuninga pissarsinissamut pisariaqartunik pisinnaatitsissutinik taamaatitsineq taakkualu piujunnaarneranni nunami misissuinerup ingerlajunnaarnera pissutaallutik, Kalaallit Nunaanni isertitat appariavinnerannik kinguneqarsinnaassaaq.

Taamaattumik Naalakkersuisut uuliamut/gassimut imaluunniit aatsitassanut suliassaqaarfimmi akiliutaasartussamik atuutsitsilernissaq akuersaarsinnaanngilaat.

Inussiarnersumik inuulluaqqusillunga  
Inuussutissarsiornermut Aatsitassanullu Naalakkersuisoq



Ove Karl Berthelsen